

Da la Greina al Pez Russein – la vischnanca da Sumvitg

■ Il territori da la vischnanca da Sumvitg s'extenda dal cunfin da la Greina en il sid fin al Pez Russein (Tödi) en il nord. Ella cumpiglia ils vitgs da Rabius, Surrein, Sumvitg e Cumpadials e numerus aclauns e bains sparpagliads dad omaduas varts dal Rain Anteriur ed en la Val Sumvitg. Il num Sumvitg deriva dal latin «summus vicus» ed inditgescha il cunfin superiur dal territori colonisà avant la fundaziun da la claustra da Mustér (enturn l'onn 700).

Rabius

Fracziun da la vischnanca politica da Sumvitg, colonisada en il temp medieval tempriv. En il quartier da Luven vivevan numerus Libers exteriurs da Lags, documentads il 1391. Ils blers da quels èn sa separads il 1511 da la dretgira dals Libers da Lags ed èn s'unids cun quella da la Cadi, ils auters in pau pli tard. Il 1643 è menziunà ina chaplutta a Rabius, il 1669 la nova baselgia da Nossadunna. Il 1901 ha constituì Rabius in'atgna pravenda. A partir dal 1837 ha sviluppà la culegna tradiziunalmain purila ina modesta industria da laina e da construcziun en lain. Atgna scola primara dapi il 1837; stgomi da classes cun Surrein e Sumvitg dapi il 1981. Incendi catastrofal il 1886. Arrundaziun dal fons 1975–87.

Surrein

Fracziun da la vischnanca politica da Sumvitg, cun il vitg da Surrein e plirs aclauns, tranter auter quels da Val e Portas en la Val Sumvitg al pe da la Greina. Plirs bains èn sparids. 765 *trans Vicum* (copia), tudestg *Surrhein* (istoric). La funcziun e l'origin da la Tuor S. Placi e da quella da Muotta Surfesti èn nunenconuschents. Il 1702 è Surrein daventà ina chaplania da Sumvitg, il 1786 è il vitg vegnì incorporà a la plaiv da S. Placi. Il 1614 han ins realisà l'emprima via d'access a Bogn Tenigia. Per il vitg tradiziunalmain puril da Surrein è era attestada l'elavuraziun da scaglè dapi la fin dal 18avel tschientaner. En ils onns 1840 stampava Giuseppe Maria Camesnisch a Surrein ina gasetta sco era cudeschs rumantschs. Dapi il 1839 ha possedi Surrein in'atgna scola primara (oz be pli classes a Rabius e Sumvitg). A Runcahez en la Val Sumvitg exista dapi il 1962 in lai da cumpensaziun da las



Sguard da Sumvitg vers Surrein a l'entrada da la Val Sumvitg.

Ovras electricas da la Svizra Nordorientala.

Adolf Collenberg

Bogn Tenigia

Bogn da cura a l'entrada en la Val Sumvitg, in dals pli vegls bogns dal Grischun, menziunà il 1580 *Bad in Wall*, ma blier pli vegl. Attestà sco feud da la vischnanca da Sumvitg a Casper Willi. Il num Tenigia cumpara pir il 1860. Funtauna freida da gip cun sal amar. Il 1670–78 en possess dal landrehter Clau Maissen ch'ha laschà construir il 1674 la chaplutta da Nossadunna da la Naiv e transformar la stiva da bogns en ina chasa per far bogns. Il 1882 ha Alexander Cagienard laschà renovar il bogn per 30 giasts. Ulteriurs edifizis èn vegnids construids 1892–96, in'atgna ovra electrica il 1905. Il 1911 ha la Hotel Waldhaus SA cumprà il Bogn Tenigia ch'è vegnì en difficultads finanzialas a partir dal 1914. Durant l'Emprima Guerra mundiala ha il bogn alloschà transitoricamain schuldada da la Germania internada. Il 1958 è il complex vegnì serrà suenter pliras renovaziuns. Il 1970 ha il Tudestg Ernst Ludwig Schulz acquistà il bogn e renovà quel en stil lu-

xurius; il 1974 han ins alura avert il bogn nov, ma senza success (scussiun averta il 1977). Il 1990 ha la Bogn Tenigia SA inizià ina nova epoca dal bogn da cura, ma danovamain senza success: il Bogn Tenigia ha puspè stui vegnir serrà il 2002.

Adolf Collenberg

Sumvitg

Vischnanca politica, circol Mustér, district Surselva, cun il center ecclesiastic e politic Sumvitg, las fracziuns da Surrein, Rabius e Cumpadials e numerus aclauns e bains sparpagliads da domaduas varts dal Rain Anteriur ed en la Val Sumvitg. 1175 in *Summovico*, tudestg *Somvix* (uffizial fin il 1985). 1850 1353 abitants; 1900 1205; 1950 1674; 1960 2004; 2000 1313. Chats dal temp da bronz (tranter 1600–1100 a.C.) sin il crest da Chischliun. En il temp medieval tempriv han purs libers da Trun, promovids dals uestgts da Cuir, rendi accessibel Sumvitg fin a la Val Russein che furmava il cunfin superiur dal territori colonisà en il temp medieval tempriv (il term Sumvitg deriva dal latin *summus vicus*, rumantsch vitg il pli si-um). A partir dal 9avel tschientaner ha glieud da la claustra da Mustér urbanisà las culegnas perifericas e la Val Sumvitg. Il chastè da Chischliun a la via per Sogn Benedetg, che alloschava beghinas en il 13avel tschientaner (fin ca. il 1365), era en il temp medieval en possess da la claustra da Mustér. Il 1252 ha quella cedi ses bains feudals a Sumvitg als signurs da Pultengia (Pontaningen). En il 13avel tschientaner è attestada ina schlatta da cavaliers *von Somvix*. A Sumvitg vivevan era uschenumnads Libers exteriurs da Lags ch'èn s'acquistads il 1511 il dretg da burgais da la Cadi. En il 7avel/8avel tschientaner è vegnida fundada la pravenda originara consecrada a s. Martin. La collatura da la baselgia parochiala da S. Gion Battista, menziunada il 1175, aveva la claustra da Mustér. Il 1491 è la baselgia vegnida incorporada a l'abazia. Dal 1656–86 èn sa dispidats prers seculars e la claustra pervia da la cessione da la giurisdicziun a l'abazia. La relaschada dals chaputschins (1687–1748) ha danovamain provocà scumbigls en ils onns 1748–67. Surrein ha appartegnì dapi il 1786 a la plaiv da Sumvitg, Rabius è daventà ina pravenda autonoma il 1901. En l'urden giudizial da la Cadi furmava Sumvitg, ensemen cun Trun, la quarta curt (fin il 1851/54). Il 1744 è la vischnanca sa liberada da la dieschma da la claustra. Sumvitg è ina vischnanca tradiziunalmain purila, en la quala numerus manaschis èn però svanids dapi il 1955 (il 2005 lavuravan mo anc radund 27% dals occupads a Sumvitg en il sectur primar). Il 1854 han ins realisà l'access a la nova via chantunala, il 1912 quel a la Viafier retica. Il 1944–47 ha erigì la Pat-

vag SA in'ovra electrica en la Val Russein. En ils onns 1956–68 èn vegnidas avertas las Ovras electricas Rain Anteriur da las Ovras electricas da la Svizra Nordorientala (OENO/NOK). Ils fits d'aua èn la segund gronda funtauna d'entrada a Sumvitg. En ils onns 1985–88 ha realisà Peter Zumthor ina chaplutta da lain a S. Benedetg ch'è daventada famosa. Meglieraziun decidida il 2002 (senza Rabius). Part da la populaziun da lingua rumantscha: 2000 88,0% / 94,0% (meglra lingua / tuttas indicaziuns).

Adolf Collenberg

Sogn Benedetg

Aclaun da la vischnanca da Sumvitg, situà a 1274 m entadim la Val Mulineun cun ca. 30 abitants. Suenten il 1350 è naschida a Sogn Benedetg ina cuminanza da beghinas senza in urden regulativ per propi (*Collegium devotorum*). Sia claustra è vegnida bandunada. Il 1268 han Rigenza de Valle e Chonradus de Reschen laschà eriger ed equipar ina nova chaplutta privata. La cuminanza religiosa, extendida fermamain il 1321, era autonoma ma tuttina colliada cun Sumvitg, nua che la claustra da Mustér aveva il dretg da preschentaziun. Dals contacts tgrirads cun la claustra en il 14avel tschientaner è sa sviluppada ina subordinaziun factica. Il 1346 è vegnì concedi in perdun. Construcziun dal chor nov 1522. Per Sogn Benedetg exista in dals pli vegls documents mantegnids en l'Europa areguard il diever da l'uschenumnada chandaila da sanctus. Il 1984 ha ina lavina destrui cumplettamain la baselgia erigida sin in spelm. Il 1988 è vegnida consecrada la baselgia nova, construida da Peter Zumthor en vischinanza dal lieu da la baselgia veglia.

Adolf Collenberg

Beghinas e begards

Comunitat religiosa da dunnas ed umens laics (begards), attestada durant la segunda mesadad dal 13avel tschientaner (1252/87) tar la chaplutta da S. Benedetg sur Sumvitg. Questa communitat d'ascets è vegnida fundada da Rigenza de Valle (Sumvitg) ed era detg independenta. Suenten il 1300 è ella sa colliada pli stretgamain cun la claustra da Mustér e disponiva d'in agen chaplon. Il 1308 è attestà in Waltherus sco chau dals begards. Suenten las charplinas dal 1365 tranter il chaplon e la claustra n'existan pli nagins documents.

Adolf Collenberg

Cumpadials

Fracziun da la vischnanca politica da Sumvitg. Culegna da cunfin al vest da la Sutsassiala, urbanisada en il temp medieval tempriv. Il num Cumpadials deriva da latin *campus*, rumantsch champ. I sa tracta d'ina tipica culegna principala dal temp medieval. Sur Cumpadials

manava la via medievala lung la riva sanestra dal Rain a Madernal en la Sursassiala, dapi il 1857 sur la Punt Russein. La chaplutta barocca, consecrada a s. Giusep, datescha dal 1641. Il 1946 è vegnida erigida a Cumpadials la Casa Sogn Giuseppe, ina dimora per attempads e chasa da tgrira, installada sco institut ecclesiastic da l'investgieu da Cuir en l'anteriur Hotel Badus. En ils onns 1932–70 era Cumpadials la sedia (parziala) da la scola professiunala per mastergns da construcziun e cusunzs (transferida alura a Glion). Quella ha dumbrà fin 120 emprendists e (paucas) emprendistas.

Adolf Collenberg

Travaulta [Balcun At/Aut]

Chastè a l'ur ost da la chavorgia da Russein al pe da la punt medievala, vischnanca da Sumvitg, tudestg *Hohenbalken*. Restanzas d'in mir da tschinta. Travaulta serviva eventualmain a ses temp da fortezza per segirar il cunfin retic tranter la Sut- e la Sursassiala, documents en scrit n'existan dentant betg. En in connex nominal nunsclerì cun il chastè da Travaulta en Surselva stat il chastè-fortezza da Balcun At, situà sin in spelm sur Müstair. Igl existan mo paucas restanzas da mirs che correspundan a las tipicas fortezzas construidas sin spelms en il 12avel u 13avel tschientaner. Documents en scrit n'existan nagins. In connex da la famiglia ministeriala Carl von Hohenbalken cun quest chastè n'è betg cumprovà, ma n'era betg exclus.

Martin Bundi

Punt Russein


Punt che collià las vischnanca da Sumvitg e Mustér sco era la Sur- e Sutsassiala e che furma in cunfin dialectal marcant. La Val Russein vegniva pli baud guntgida sur Cumpadials via la riva sanestra dal Rain a Madernal e Disla. Il 1669 ha l'avat Adalbert II da Mustér laschà construir in'emprima punt da crap ad artg sur la chavorgia. Oz mainan trais punts sur la Val Russein: la Punt da Barcuns, ina punt da lain cun tetg construida il 1857 (anc averta per persunas), la punt da crap da la Viafier retica cun ses quarter artgs, erigida il 1911 e la punt da betun dal 1938 cun artgadas da 82 m lunghezza (per automobils). Ina tavla commemorativa a la Punt Russein regarda als perscrutaders da la natira sursilvana Arnold Escher von der Linth, Placi a Spescha e Gottfried Ludwig Theobald.

Adolf Collenberg

Pez Russein / Tödi

Muntogna marcanta (3614 m) al cunfin tranter ils chantuns Grischun (Sumvitg/Mustér) e Glaruna (Linthal), grip cumpact, levamain smuttà, en furma da piramida, tudestg *Tödi*. 1706 Tödiberg, l'emprima ascensiun dal Pez Russein è succedida il prim da settember 1824: ils dus chatschaders da chamutschs Placi Curschellas da Trun ed Augustin Biscuolm da Mustér han ascendi la muntogna, intimads dal Pader Placi a Spescha, sin la ruta Val Russein – glatscher da Bleisaverdas – paraid sidvest. Il 1861 ha Rudolf Theodor Simmler da Berna ascendi il Pez Russein e sviluppà silsuent l'idea d'ina associaziun dals amis da las muntognas; il 1863 ha el alura fundà il Club alpin svizzer. La chamon Grühorn (2448 m) da la secziun Tödi dal Club alpin svizzer è vegnida erigida il 1863 sco emprima chamon dal Club alpin svizzer insomma.

Martin Bundi



Punt da lain dal 1857 e punt da la Viafier retica en la Val Russein. (Placat dal 1911).

Lexicon Istoric Retic

Il LIR cumpiglia bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.